

» dise, nè quando l' eccitamento e el comando i abbia da verificar,
 » nè quando da sti corpi i abbia da provveder. E intanto seguita el
 » monopolio dei partiti, e intanto se compisce i sei anni dell'abboc-
 » camento (1), e intanto se chiude la porta al tanto necessario tagio
 » de questi, e seguita intanto un ministero senza disciplina, cresce i
 » mali, e, oh Dio! se ancuo se vede difficile el rimedio, un altro
 » giorno a tal i arriverà, che el ripararghe sarà impossibile. Le ghe
 » ne ha una prova de fatto. El decreto 1772 ha comandà, che se
 » versasse sul sacerdozio, sul clero, sui ospedali. Le ga el decreto;
 » cosa halle fatto? Finalmente dopo tanto tempo se vede comin-
 » ciar un poche de fabbriche nell' accademia dei nobili. Ma del
 » clero, dei ospedali cosa ze stà fatto? Gnente. Salle perchè no ghe
 » fu nel decreto posto limite e tempo? Semo nell' istesso caso. An-
 » che nella proposizion no ghe ze tempo prescritto. La sarà donca
 » illusoria in sto primo aspetto, ma se tal la lo ze in questo, più an-
 » cora le la vedrà in un' altro. No alteremo parole per far dei equi-
 » voci. Qual ze la sostanza della proposizion? El senato versi sul
 » lusso. Domando perdon, mi non ho nominà sta parola: questo ze
 » un termine per esercitar le menti dei giovani accademici. Ho
 » parlà della moderazion del popolo, perchè con un eccessivo in-
 » conveniente dispendio noll' arrivi a eguagliar el cittadin. El lusso
 » ze un argomento peculiar del senato, e mi son colla serenissima
 » Signoria. Ma a sti disordini bisogna apporghe rimedio. L' ha ditto
 » el mio eccitamento, con 545 voti confermà, l' ha ripetudo 447
 » costanti voti. I mali ze nati sotto i occhi delle leggi, dei magistrati
 » e dei corpi. La loro sopravvenienza no la imputo a delitto de sti
 » corpi. I sarà stadi vigilanti, attenti; ma appena nasce una legge,
 » che l' umana malizia tenta d' infirmarla. Co sta proposizion che
 » no ze, che una preservazion de ordinarj metodi, qual speranza de
 » risorger, se colle leggi ordinarie non ostante ghe ze i mali? Ze
 » donca delusoria la proposizion, perchè la ze difettiva. Sia accordada

(1) Ossia dell' *impresa*, ovvero, dell' *appalto*.